

Die Verbond

שמע ישראל יהוה אלהינו יהוה אחד

*Sh'ma Yisra'el Yahuah eloheinu
Yahuah egad.*

Luister, hoor en doen Yisra'el, יהוה
is ons God; יהוה is een

Gen 17

- 7 “Ek sal My verbond oprig tussen My en jou en jou nageslag ná jou, in hulle geslagte, as ‘n ewige verbond: Ek sal vir jou God wees en vir jou nageslag ná jou.
- 8 Ek sal ook aan jou en jou nageslag ná jou die land, waar jy besoeker is, gee; die hele land Kena’an, as ‘n ewige erfenis en Ek sal hulle God wees.”

9 God het ook vir Avraham gesê: “Wat jou betref: jy moet My verbond nakom, jy en jou nageslag ná jou, van geslag tot geslag.

10 Dít is My verbond wat jy moet nakom tussen My en jou en jou nageslag ná jou.

Almal wat manlik onder julle is, moet besny word.

11 Julle moet aan die vlees van julle voorhuid besny word en dit sal ‘n teken wees van die verbond tussen My en julle.

Yir 31

31 "Let op, daar kom dae," verklaar יהוה, "wanneer Ek met die huis van Yisra'el en die huis van Y'hudah 'n nuwe verbond sal sluit,

32 nie soos die verbond wat Ek met hulle vaders gesluit het op dié dag toe Ek hulle aan die hand gevat het om hulle uit Egipteland uit te bring nie; My verbond wat hulle verbreek het, alhoewel Ek Meester oor hulle was," verklaar יהוה.

33 Hierdie is egter die verbond wat Ek na daardie dae met die huis van Yisra'el sal sluit," verklaar יהוה: "Ek sal My wet binne-in hulle sit en dit op hulle verstand, wil en emosie skryf en Ek sal hulle God wees en hulle sal My volk wees"

34 Hulle sal nie meer elkeen sy naaste en elkeen sy broer leer nie en sê: ‘Ken יהוה,’ want hulle sal My almal ken, van die kleinste tot die grootste van hulle,” verklaar יהוה, “want Ek sal hulle oortredinge vergewe en hulle sondes nie meer onthou nie.”

36 “As hierdie vaste orde vertrek voor My Teenwoordigheid,” verklaar יהוה, “dan sal die nageslag van Yisra’el ook vir altyd ophou om ‘n volk in My Teenwoordigheid te wees.”

Die woord vir '**Verbond**' kom van die antieke stam, בָּרָה, wat beteken om te kies, te eet en duidelik te maak.

בְּרִית (b'reit) beteken 'n verbond wat gemaak is deur tussen twee rye vleis van 'n opgesnyde dier deur te loop. Betekenis....

Hierdie woord verwys nie na 'n testament nie. Niemand hoef dood te gaan vir hierdie verbond om geldig te wees nie, maar die nakoming van die ooreenkoms tussen die twee partye verseker die geldigheid. Die woord (b'reit) kom 264 keer in die Tanakh voor.

Hier is dit belangrik om te sê dat die erfenis wat ons in Yeshua ontvang het, deur Sy dood, nie dieselfde is as die Nuwe Verbond waarvan Yeshua die Tussenganger geword het nie.

Dit is twee aspekte van wat Hy op aarde kom doen het, maar nie dieselfde nie.

Daar is slegs een verbond tussen Yahuah en die mens. 'n Verbond wat Hy sedert die skepping telkens in groter detail met ons kom deel; 'n ewige Verbond. Dit beteken dit is tydloos, van tydlose begin af tot in ewigheid. 'n Verbond wat van altyd af volledig en volmaak is, maar waarvan dele op יהוה se bepaalde tye in groter en dieper detail aan die mens openbaar word.

Elke nuwe geopenbaarde deel van die verbond is dus ewig en kan nooit wegval nie, maar kan meer volmaak openbaar en verduidelik word; daarom is die verbond met 'n enkel persoon, nie met hom as persoon alleen nie, maar met hom en almal onder sy outoriteit en nageslag: hulle wat die voortgaan en verbreding van Sy verbond uitbeeld en ontvang om dit weer bekend te maak.

Elke keer is daar 'n grens aan hierdie verbond. Dit is:

Daar is toelatingsvereistes en verantwoordelikhede. יהוה kan nie anders as om altyd getrou te wees aan Sy deel van die verbond nie en verwag dat die mens getrou is aan sy deel daarvan. יהוה self stel die voorwaardes van die verbond vas en die mens aanvaar of verwerp dit net.

Die konsep van "Nuwe" Verbond, is dus die openbaring van 'n nuwe dimensie van die verbond, wat die vorige, "ou", openbaringe 'n nuwe, ryker en vollediger betekenis, waarde en gevolg kom gee. Die nuwe kan slegs volledig verstaan word as ek die volheid van die vorige dele van die verbond verstaan en ek kan dus nooit enige deel van die ewige verbond, soos geopenbaar, weggooi, omdat ek die 'nuwe' ontvang het nie.

Dit is juis deur die vorige
openbarings dat ek die nuwe
volledig kan verstaan. Sy verbond
sal voltooid voortgaan tot ons, in
die volheid van die
Teenwoordigheid van יהוה, die
volheid kan sien en verstaan.

**Yahuah het die Verbond
ontwerp, ons kan nie ons eie
interpretasies en betekenis
daaraan gee nie.**

**Die verbond met Yisra'el deur
Moshe het nie die verbond met
Avraham gekanselleer nie, maar
vollediger uitgespel; net soos die
"nuwe" nie die "voriges"
kanselleer nie, maar volledige,
dieper betekenis kom gee.**

Gal 3

17 "en ek sê dít: dat die verbond wat deur God, in Die Gesalfde Een, van die begin af bekragtig is, nie deur die geskrewe wet, wat vier honderd en dertig jaar later gekom het, gekanselleer is om so die belofte tot niet te maak nie,

18 want as die erfenis vanuit die geskrewe wet is, dan is dit nie meer die vervulling van die belofte nie, maar God het dit aan Avraham deur 'n belofte gegee."

By elke nuwe openbaring is daar egter
gebruike, metodes en vorm wat
verander vir die voortgaan en
gehoorsaamheid van die nuut
geopenbaarde deel van die verbond.
Dit maak die voriges nie sleg of boos
nie, maar net aangepas of veranderd
om beter die nuwe omgewing van die
verbond te bedien.

יהוה se verbond met Adam:

Gen 1:26

en God het gesê: "Laat Ons die mens maak na Ons beeld, net soos Ons en laat hulle heers oor die visse van die see, die voëls van die hemel, die vee en oor die hele aarde en oor al die diere wat op die aarde beweeg."

יהוה gee aan die mens outoriteit oor die skepping en verwag dat hy moet heers (Gen 2:15 gee meer detail) en die beeld (Karakter en Outoriteit) van יהוה moet dra.

Dit is om volk van Yahuah te wees.

Het dit verander?

Nee, dit is steeds Sy wil.

Gen 1:29 God het ook gesê: "Ek gee nou aan julle al die saaddraende plante, wat op die hele aarde is en al die bome met saaddraende vrugte. Dit sal julle kos wees."

יהוה gee **Sy voorsieningsbelofte** wat later vergroot word. Daar was nog geen dood nie, want daar was geen sonde nie, daarom het hulle net plante en saad geëet.

Ek glo dat יהוה nie tekens, simbole
en beloftes nodig gehad het in Sy
verbond met Adam nie omdat
hulle 'n perfekte
verbondsverhouding gehad het.
Sy woorde aan Adam was 'n
volledige verbond. Hieruit kan die
volle rede en straf vir die
sondeval ook verstaan word.

Gen 2:16,17: en יְהוָה -God het die mens beveel en gesê: "Van al die bome van die tuin mag jy as kos eet, **17** maar van die 'Boom van die Kennis van Goedheid en Boosheid,' daarvan mag jy nie eet nie, want op die dag as jy daarvan eet, sal jy die dood sterf."

Nou word יְהוָה se **voorwaardes** gestel, soos in elke openbaring van die verbond. Ek het vir jou die goeie gegee, jy het nie nodig om die bose te ken nie.

Dit is steeds hoe יהוה die beste vir ons weet.

Rom 16:19b: "en ek wens dat julle wys mag wees oor wat goed is, maar onskuldig oor wat boos is."

Ook dit het steeds nie verander nie. Sy verbondsvoorwaardes bly dieselfde.

יהוה gee ook Sy verbondsverhouding aan die mens as man en vrou met mekaar.

Gen 2:18 יהוה-God het ook gesê: "Dit is nie goed dat die mens alleen is nie. Ek sal vir hom 'n helper maak wat pas by hom."

Wanneer die vrou nie meer helper is
vir die man om die verbondsopdrag
uit te voer nie, dan verbreek ons die
verbondsooreenkoms met יהוה.

Ons kan nie ons eie planne by יהוה s'n
sit nie.

Ook dit het steeds nie verander nie.

Ons is dieselfde en gelyk aangaande
Yeshua se verlossing, maar nie
aangaande ons verbondsopdrag nie.
Die man se opdrag is om hard te
werk, te heers en te versorg en יהוה se
beeld uit te dra en die vrou se taak is
om hom daarin by te staan en te help.
Nie haar eie ding te doen nie.

Gen 2:24: "Daarom, soos die man sy vader en moeder verlaat en sy vrou aankleef, sal hulle een vlees wees."

Net so is die man se verantwoordelikheid om sy vrou bo enige en alle ander te stel; selfs sy eie ouers. Sy is jou eerste verantwoordelikheid in die versorging en outoriteitstaak wat aan jou gegee is. As dit só is en albei kom hulle deel van die opdragte na, is daar weinig plek vir tweespalt en onenigheid. Elke huweliksprobleem kan teruggevat word na die verbondsooreenkomste wat verbreek word.

Gen 1:28 God het hulle geseën en God het vir hulle gesê: "Wees vrugbaar en vermeerder en vul die aarde,"

Die mens se vrugbaarheid as belofte en vermeerdering as opdrag, is ook deel van יהוה se verbond.

Die seksuele deel van die huwelik is net so mooi en skoon soos die res van God se skepping. Daar is egter hier geen sprake daarvan sonder die verbondsverhouding van die huwelik nie.

Dit is die aanvang en openingsrede tot die verbond. Dit is volledig en voldoende, maar deur die sonde en ongehoorsaamheid van die mens, het יהוה nodig gehad om elke keer Sy verbond te bevestig en uit te brei.

Nou kom daar ander voorwaardes, openbaringe en opdragte by.

Die hele agterkant van die verhoog
verander.

Nou moet alles uitgespel word.

Die mens het, deur sy
ongehoorsaamheid, die bouse en die
moeilike deel bygekry.

**God se wil word nou deur sonde
verdof.**

Daar het nou byvoorbeeld offers en reëls vir die offers bygekom.

Die algemene gedagte is dat יהוה die offers deur Moshe ingestel het, maar dit is nie waar nie.

יהוה het Sy verwagtings vir die offers reeds van die begin af vir die mens gegee. Hoe kan daar 'n verkeerde offer wees, met straf, as die mens nie weet wat die regte offer is nie?

Gen 4:4,5 " ... יהוה het Hevel en sy offer
aanvaar, 5 maar Kayin en sy offer nie
aanvaar nie"

Ek glo dat יהוה reeds Sy voorwaardes en
vereistes, waarvolgens die offers gemaak
moet word, volledig vir hulle gegee het -
net soos die hele wet.

'n Ander belangrike aspek is dat יהוה se verbond altyd met die persoon en sy nageslag gesluit is. Met Adam se verbreking van die verbond van lewe, is die verbond met die ganse mensdom verbreek en moes God dit aanpas en herbevestig vir die mens om weer lewe, ewige lewe, te kan ontvang.

Noag

Die volgende aspek van die verbond word aan Noag gegee. Die mens het boos geword en alle verbondsaspekte verbreek - nog 'n bewys dat die wet reeds bestaan het. יהוה kies om Sy verbond te bevestig en voort te sit deur Noag, wat volgens יהוה se wil geleef het en sy nageslag.

Gen 6:18 "Met jou sal Ek My verbond bevestig; jy moet in die ark ingaan, jy en jou seuns en jou vrou en die vroue van jou seuns saam met jou."

Hier is weereens die eerste voorwaarde, 'jy moet in die ark ingaan.' יהוה se verbond het altyd voorwaardes by.

Dit is jou deel van die verbond.

Noag het gewys hoekom יהוה hom kon kies.

Gen 7:5 "Noag het alles gedoen wat יהוה hom beveel het."

Nou beweer mense dit is te moeilik?

Gen 8:20 "Noag het vir יהוה 'n altaar gebou en van elkeen van die rein diere en van elkeen van die rein voëls gevat en brandoffers op die altaar gebring **21**en יהוה het die aangename geur geruik en יהוה het in Sy wil en verstand gesê: "Ek sal die aarde nie weer vervloek ter wille van die mens nie, want elke vorming van 'n gedagte in sy gedagtes en wil van sy jeug af is boos en Ek sal ook nie weer al die lewende wesens tref soos Ek gedoen het nie.

22 Terwyl die aarde bestaan sal saaityd en oestyd, koue en hitte, somer en winter en dag en nag nie ophou nie."

Na die vloed het Noag geweet wat is rein en wat is onrein diere en hoe om aan יהוה 'n offer te bring.

Die wet was nie nuut nie, net nie uitgestip en op skrif met strawwe uitgespel nie.

Aspekte vd Verbond wat nou na vore kom.

1. Die voorwaarde is, Noag moet die ark bou en ingaan soos יהוה hom beveel.
2. יהוה maak 'n belofte om die aarde nie weer te vervloek nie en dat seisoene ens. sal voortgaan soos dit moet.
3. **Gen 9:1** - God bevestig die vorige verbondsdeel: "Wees vrugbaar, vermeerder en vul die aarde.
4. : 2 Bevestig die mens se outoriteit oor die natuur

5. vs. 3,4 Nou is daar 'n verbreding in die voorsieningsdeel van יהוה se verbond. Vleis word nou ingesluit in יהוה se kos wat hy vir die mens gee. Weereens met 'n voorwaarde - jy mag nie die bloed eet nie.

6. vs 5,6 Om 'n mens se lewe te neem, word nou gespesifiseer as teen יהוה se verbond. Die rede: omdat ons na יהוה se beeld geskep is. Kayin is reeds daarvoor gestraf, so dit was ook vroeër geldig, maar nou word dit uitgestip.

7. In vs. 10 is daar 'n interessante verbreding in bekendmaking. יהוה se verbond is nie net met die mens nie, maar ook met die diere en die natuur. Dit was so vanaf Adam, deur sy outoriteit, maar nooit uitgespel nie.

8. vs. 11 gee die omvang van die verbond - dat יהוה nie weer 'n vloed sal stuur wat die ganse aarde sal vernietig nie.

9. In vs. 11-13 gee יהוה 'n teken wat die mens kan sien en die verbond onthou. יהוה maak dit maklik vir die mens om Sy verbond te onthou. Hy gee vir hom 'n sigbare teken wat hy nie kan mis nie. Die teken is in die natuur. יהוה sê egter ook dat die teken daar is vir Hom, om Hom te herinner aan Sy verbond met ons - vs. 15.

10. In vs. 15 sê יהוה ook self dat hierdie 'n ewige verbond is. Dit kan aangepas en verbreed word en meer duidelik gemaak word, maar hierdie verbond kan nie tot niet gemaak word nie!

Avraham

יהוה se verbond met Avram en sy nageslag begin deur 'n roeping tot gehoorsaamheid. יהוה kies 'n man wat Hy weet Hom sal vertrou en openbaar Sy wil aan hom.

Weereens is daar verantwoordelikhede en beloftes.

Gen 12:1-3 "יהוה" het vir Avram gesê:

"Jy, gaan jy uit jou land, uit jou familie en uit jou vader se huis uit, na die land wat Ek jou sal wys **2** en Ek sal jou 'n groot nasie maak en jou seën en jou naam groot maak en jy sal 'n seën wees **3** en Ek sal diegene seën wat jou seën en hom vervloek wat jou vervloek en in jou sal al die families van die aarde geseën word."

1. Avram se verantwoordelikheid: trek weg in vertroue.
2. יהוה belowe dat hy 'n groot nasie sal wees. (Avram is 75 en Sarai (Spottery) = 66.)
3. Avram se naam sal groot gemaak word.
4. Avram sal 'n seën wees vir al die families, volke en nasies op aarde.
5. Hy laat nie Sy kinders ongestraf slegmaak en vervolg nie. Hulle wat aan jou goed doen sal יהוה beloon en hulle wat teen jou opstaan, omdat jy kind van יהוה is en die waarheid verkondig, sal deur Hom gestraf word; daarom hoef die kind van יהוה nie aan ander terug te doen of te vergeld nie. Hulle sal by יהוה betaal.

Kan jy reeds hier weer die 2 kante van die verbond sien?

"Ek sal vir jou 'n God wees en jy moet vir My 'n volk wees."

Hierna het יהוה weer aan Avram verskyn en begin om die groter omvang van die verbond wat Hy met hom wil sluit duidelik te maak.

Gen 15:1-18

1. יהוה begin weer deur 'n beskermingsbelofte en 'n seën:
vs. 1. יהוה sê: “Ek sal jou God wees.”
2. vs. 4 "een wat uit jou eie liggaam sal kom, hy sal jou erfgenaam wees."
3. :5 herhaal יהוה die belofte, Gen 12:2, dat hy 'n groot nageslag sal hê
4. Avram bewys homself 'volk van יהוה' vs. 6 "hy het op יהוה vertrou en Hy het hom dit tot opregtheid en onskuld gereken." Hierdie is die kern van die verbonds-verhouding tussen יהוה en Avram. 'n Wedersydse vertrou. Ya'a 2:23: Aanvaar en doen יהוה se verbond en Hy sal jou as opreg en onpartydig aanvaar.

5. Die eerste belofte van die besit van die land in Gen 13:14-17 word weer bevestig
6. In Sy getrouheid vertel יהוה vir Avram dat die volk 400 jaar in Egipte gaan wees (: 13). Daar was geen verrassing vir יהוה nie, Hy het dit reeds geweet en self beplan.
- 7. **Gen 17** Belofte en 'n voorwaarde aan Avram. vs. 1 Ek is vir jou meer as genoeg in alle opsigte, jy moet in My Teenwoordigheid bly en vlekkeloos wees.

8. Die bevestiging vs. 7 - die verbond is deur jou nageslag vir ewig.
9. Nou is dit Avraham se verantwoordelikheid: 'jy moet vir My 'n volk wees.' In vs. 10 gee יהוה Avraham se verbondsteken vir sy fisiese nageslag en almal onder sy outoriteit, almal wat deel wil kry aan die verbond van יהוה met Avraham: besnydenis aan die vlees. יהוה doen dit nie; Avraham moet dit self doen. Dit is sy verantwoordelikheid. Hy het 'n keuse om dit te doen of nie en almal wat dit nie doen nie word afgesny van die volk.

Moshe

יהוה sluit nie hier 'n verbond met Moshe as persoon nie, maar met die volk, Yisra'el. Dit is 'n vergelyking wat ons kan tref. Moshe het die tussenganger van die verbond geword, net soos Yeshua die Tussenganger van die 'nuwe' verbond geword het. Die verbond is ook nie met Yeshua gesluit nie, want hoe kan יהוה met Homself die verbond aangaan? Die verbond is deur Yeshua met ons gesluit.

Eks 6:6-8

"Daarom, sê vir die kinders van Yisra'el: 'Ek is יהוה en Ek sal julle onder die las van die Egiptenare uitbring en julle red uit hulle slawerny. Ek sal julle loskoop deur 'n uitgestrekte arm en deur groot oordele. 7 Ek sal julle vir Myself as volk vat en vir julle God wees en julle sal weet dat Ek יהוה, julle God, is, wat julle uitbring onder die las van die Egiptenare 8 en Ek sal julle bring in die land waarvan Ek My hand opgelig het, om dit aan Avraham, aan Yitz'gak en aan Ya'akov te gee en Ek sal dit aan julle as 'n besitting gee. Ek is יהוה'."

Streng gesproke is al יהוה se opdragte
deel van Sy verbond en voorwaardes
hoe om Sy volk te wees!

Outoriteit.

Eks 19:4-8

1. Vs. 4: יהוה verklaar - 'Ek kom My deel na
- Ek is God vir julle.'
2. Voorwaarde: "As julle na My stem luister
om te gehoorsaam en My verbond
nakom."
3. Hulle rol en taak in die wêreld :
"Julle sal vir My 'n koninkryk van
priesters en 'n afgesonderde nasie wees."

Dit is die volgende stap in die lering; hoe om 'volk van יהוה' te wees. Die priester se taak is om te offer, versoening te doen en dit is nou die kern waar rondom al God se handel met die volk gaan draai - die tabernakel.

Hulle moet ook afgesonderd wees. Die volk moes verstaan dat hulle nie dieselfde as ander nasies is of moet wees nie.

Hulle is afgesonderd vir יהוה se plan.

1 Kefa 2:9

"Julle is 'n gekose nasie, om te dien as priesters in die Koninkryk, 'n afgesonderde volk, bymekaargemaak en bevry, om die lofprysinge van Hom, wat julle uit die duisternis geroep het, te verkondig tot Sy wonderlike lig."

Dit is ons deel van die verbond!

יהוה se verhouding blyk steeds baie persoonlik en naby te wees, met 'n persoon, maar dit skyn asof Hy deur die enkel persoon, Moshe, met die volk werk; asof daar nie so 'n persoonlike verhouding met die volk meer is nie; asof hulle hardkoppigheid 'n verandering in die verhouding gebring het. My ondervinding is dat יהוה met hulle wat wil vertrou en saamwerk, werk.

Nou volg die wette en voorskrifte en oordele van יְהוָה aan die volk. Vir my is dit 'n voortvloeiende uit die voorwaardes en vereistes wat יְהוָה stel in Sy verbond. Om vir יְהוָה 'n volk te wees is dit dít wat jy moet doen. Dit is deel van die ewige, onveranderbare verbond van יְהוָה.

Verwerp hierdie lewensstandaard en jy verwerp Vader se verbond!

Die wet is deel van יהוה se verbond, dit is,
die voorwaardes om te deel aan Sy
verbond:

Eks 24:7

"Hy het die Boek van die Verbond gevat en
dit voor die ore van die volk gelees en
hulle het gesê: "Alles wat יהוה gesê het,
sal ons doen en gehoorsaam"."

Moshe neem nou die bloed van die offers en maak die volgende verklaring:

Eks 24:8 "Moshe vat die bloed en sprinkel dit op die volk en sê: "Hierdie is die bloed van die verbond wat יהוה met julle gesluit het op grond van al hierdie woorde."

Dit is dieselfde woorde wat Yeshua gebruik het om Sy bloed as offer voor te stel. Die draad loop regdeur die verbond.

Dit is die bloed van die offers wat hulle as priesters in die tabernakel en later in die tempel en Yeshua aan die kruis bring wat wys na die verbond.

Hand 3:25 "Julle is kinders van die profete en van die verbond wat God met ons vaders gesluit het toe Hy vir Avraham gesê het: 'En jou Saad sal goeie dinge oor al die geslagte van die aarde laat kom'." **Gen 22:18; 26:4**

Ek is van oortuiging dat יהוה nie die wet net vir Yisra'el gegee het nie, maar vir hulle as gekose volk om as voorbeeld te dien vir die ander, **waardeer almal kan weet hoe om die enigste God te aanbid en te dien.** Dit is die rede waarom יהוה 'n volk gekies het. Nie 'n bestaande volk nie, maar een wat Hy van die begin af volgens Sy verbond saamgestel het

en daarom ook aan hulle 'n teken
gegee het as bewys dat hulle deel is
van hierdie gekose volk wat as
voorbeeld moet dien

Die besnydenis

Die besnydenis is as teken gegee van
die behoort aan die volk wat יהוה
gekies het en elkeen wat by die
fisiese volk wou inkom, van watter
nasie ookal, moes dit ook doen.

Die volk se ongehoorsaamheid het hulle nie baie effektief gemaak as getuies nie.

Weereens het God in 'n mens op aarde die voorbeeld kom stel van die lewe en gehoorsaamheid wat Hy verwag = In Yeshua.

Ons het altyd al die wette en feeste en opdragte gesien as "Joodse wette" ens. Dit is 'n totale verkeerde begrip. Dit is Bybelse wette. יהוה se wette. יהוה se feeste. יהוה se opdragte; ook vir jou en my - as Hy my God is en ek Sy volk is. Sy volk is egter nie meer NET Yisra'el nie, maar die geestelike volk wat deur Hom regeer word.

Nou word ek nie meer deel van hierdie nuwe familie deur die besnydenis as my toelatings-teken nie, maar deur die besnydenis van die verstand, wil en emosie en gees.

Dit gaan ook deur na die verbonds-openbaring in Yeshua, waar dit nou 'n geestelike besnydenis van die hart word vir hulle wat in die Gees inkom

- **Kol 2:9-12**

Die Nuwe Verbond

Of die vervolmaking van wat van die begin af die versekerde verwagting was vir elkeen wat Die Gesalfde Een, (Mashiag), verwag het.

'Nuwe verbond' in hierdie gedeelte beteken die verbond wat God nuut kom maak het, nie 'n gans-ander verbond nie. 'n Nuwe kontrak – met dieselfde woorde.

'Ou verbond' beteken die verbond wat deur Yisra'el verbreek is en dus deur God verwerp kon word, maar uit Sy onverdiende guns, kom skeep Hy dit oor, met nuwe aspekte, tot 'n nuwe, meer volledig geopenbaarde, verbond. NIKS van die oue het weggeval nie, maar is geheel en al vernuwe - hoe?

Dit is wat ons moet bestudeer in die Woord.

Die probleem ontstaan vanuit die stelling dat Vader se verbond ewig is en nie kan wegval nie.

Yisra'el het egter die verbond verbreek en Vader het die verbreking bevestig.

Hos 10:1-4 1 Yisra'el is 'n weelderige wynstok; hy produseer vrugte vir homself. Hoe meer vrug hy gedra het, hoe meer altare het hy gebou; hoe ryker sy lande, hoe beter het hy die pilare gemaak.

2 Hulle verstand wil en emosie is vertroueloos; nou moet hulle hul skuld dra; יהוה sal hulle altare afbreek en hulle pilare vernietig.

3 Nou sal hulle sekerlik sê: “Ons het geen koning nie, want ons het nie respekvolle vrees vir יהוה nie. Die koning, wat kan hy vir ons doen?”

4 Hulle praat woorde wat aan vals altare behoort; **hulle het die verbond verbreek** en die prys betaal. Hulle is soos vore in 'n droë land.

Yes 33:8 Die hoofpaaie is verlate, die reisigers het opgehou. **Hy het die verbond verbreek**, die stede verag, Hy neem die mens nie in ag nie.

9 Die land treur en kwyn weg; L'vanon staan beskaamd en verwelk; Sharon is soos 'n woestynvlakte, Bashan en Karmel het hul blare verloor.

10 “Nou sal Ek opstaan,” sê יהוה, “nou sal Ek verhoog word, nou sal Ek opgelig word.

11 Julle het bevrug geraak van strooi, julle sal geboorte gee aan stoppels; **My asem sal julle verteer soos 'n vuur.**

Hierdie feit word op baie plekke bevestig. Wettiglik kan die verbond nie sommer net weer opgetel en daamee aangegaan word nie. Dit is verbreek, “null and void,” bestaan nie meer nie. ‘n Nuwe getekende verbond is nodig.

MAAR

Deur Vader se onverdiende guns en as gevolg van Sy belofte dat dit ewig is, skryf Hy die verbond soos dit was – dit is onverdiende guns.

Ek sal jou God wees – jy moet vir My ‘n volk wees.

= Ek stel die reëls en standarde – jy moet hulle gehoorsaam.

Die Nuwe Verbond = Ek is jou God – jy is My volk.

Nou moet ons ook niks van יהוה se
Karakter en Outoriteit, of die
samestelling, voorwaardes en
beloftes van יהוה se verbond,
vergeet nie.

Die sg. 'ou' Verbond is net soveel uit 'genade' en gebaseer op vertrouwe en nie op dade nie, (behalwe nakoming van voorskrifte), as die 'nuwe' Verbond, (Kayin het ook geoffer, net soos Hevel, maar dit is nie in die daad nie, maar as gevolg van die gees en denke waarin die aanvaarding en verwerping lê),

met natuurlik daarmee saam die ryker en volmaakte betekenis van יהוה se openbaring deur Yeshua. Die klem het verskuif en ek gaan dit vir u in die Skrif probeer wys. U sal egter eers die konsep 'dat die verbond weggeval het en יהוה 'n gans nuwe een uitgedink het' moet vergeet en יהוה se Gees vra om Sy waarheid aan u te openbaar.

Yir 31

31 "Let op, daar kom dae," verklaar יהוה, "wanneer Ek met die huis van Yisra'el en die huis van Y'hudah 'n nuwe verbond sal sluit,

32 nie soos die verbond wat Ek met hulle vaders gesluit het op dié dag toe Ek hulle aan die hand gevat het om hulle uit Egipteland uit te bring nie; My verbond wat hulle verbreek het, alhoewel Ek Meester oor hulle was," verklaar יהוה.

33 Hierdie is egter die verbond wat Ek na daardie dae met die huis van Yisra'el sal sluit," verklaar יהוה: "Ek sal My wet binne-in hulle sit en dit op hulle verstand, wil en emosie skryf en Ek sal hulle God wees en hulle sal My volk wees"

Volg asseblief die vergelyking met die verbond soos reeds gegee en sien self die ooreenkoms en verskille.

1. :30 Die verbond se konsentrasie en kern is nou op die individu gerig. Alhoewel 'n groep, soos 'n gemeente, steeds deur die sonde van een persoon beïnvloed word, is die straf en verbondsverbreking die individu s'n. Jy is nie vergewe, dus kind van יהוה, as jy nie persoonlik 'n verbondsverhouding met יהוה, deur wedergeboorte, het nie.

2. :31 Dit is baie belangrik. יהוה het nie die verbond met Avraham, Yitz'gak en Ya'akov weggegooi en met die "Kerk" 'n nuwe verbond kom sluit nie. NEE. Dit is 'n arrogante en hoogmoedige dwaalleer wat nie יהוה se Woord in ag neem nie! Hierdie Yisra'el is weereens die volk Yisra'el, asook elkeen wat deur Yahuah beheer word. Net elkeen wat besny is!! Die volk Yisra'el, omdat dit God se opdrag vir die volk is en die kind van God wat na die Gees, deur wedergeboorte, besny is.

DIT IS ALLES DIESELFDE - NIKS HET VERANDER NIE - DIE KLEM EN METODE VAN TOETREDE HET VERANDER NA DIE GEESTELIKE.

Dieselfde reëls van יהוה geld. Bv. Yisra'el moes die persoon wat nie besny is nie uit sy midde verwyder en afsny van die volk en daarom van die tempel en daarom van die verbond af. Die "Kerk" sit vol onbesnedenes na Gees en noem homself 'van die nuwe verbond.' Hoe werk dit? Nee, die standaard is dieselfde. Hy wat nie wedergebore is en leef volgens יהוה se standarde nie, is nie deel van יהוה se Kerk nie en is besig om die afgesonderdheid en groei van die liggaam te belemmer en meeste van die tyd totaal te stop. Kom uit hulle midde uit, sê יהוה, as hulle nie wil luister nie, **Open 3:15,16.**

3. Die woord 'nuwe' :

Met elke vorige verbondsverbreding het יהוה terugverwys na die begin van die verbond en Sy nuwe aspekte bygevoeg en meer verduidelik in groter detail. Yahuah se verbond is van die begin af volledig en volmaak, יהוה het dit net duideliker kom uitspel aan die mens wat elke keer sy eie ding wil doen. As jy dit nie glo nie, glo jy dat יהוה 'n fout gemaak het. Hierdie keer word die fisiese verbreed met 'n volmaakmaking wat nodig het dat die persoon se denke verander. Ek hoef nie meer te offer nie, want dit is vir en namens my gedoen, maar ek moet dit myne maak en aanvaar, asof ek dit gedoen het. Hoop dit maak sin.

Niemand anders mag Sy wette verander nie.

Is dit so moeilik om te sien: יְהוָה sê Hy het DIE WET op ons verstand wil en emosie geskryf. Hoe kan enige een beweer die wet is nie meer vir ons vandag geldig nie?

Niemand het gesê ek verdien daardeur my redding en verlossing nie; selfs Yisra'el het nie (Rom 3:20), maar wel deur vertrouwe in die Een wat die wet gegee het.

Die wet is יְהוָה se verbondsvoorwaardes tot ons beswil.

5. Die wet is op ons gees en verstand geplaas.

Niemand het meer 'n verskoning nie. Rom 1:20

Soos Yisra'el die voorbeeld vir ander nasies was, waardeur hulle kon sien en weet wat יהוה se wil is en dit dan aanvaar of verwerp, so is Yeshua die voorbeeld in volmaaktheid vir ons en almal op aarde. Dit is hierin dat dit 'n nuwe verbond is.

:34. Almal sal weet, niemand hoef hulle te leer nie. Ons moet net die antwoorde van hoe, na die nasies neem; die voorbeeld wees van hoe יהוה verwag om aanbid te word in die aanvaarding van Sy verlossing deur Yeshua.

Yisra'el moes vir die nasies tot voorbeeld wees en was ongehoorsaam. Ons wat nou as voorbeeld vir hulle moet dien, Rom 11, aanvaar dan self nie יהוה se standarde nie! Hoe kan hulle glo? Ons is net so ongehoorsaam!

Hand 3:25,26 "Julle is kinders van die profete en van die verbond wat God met ons vaders gesluit het toe Hy vir Avraham gesê het: 'En jou Saad sal goeie dinge oor al die geslagte van die aarde laat kom.' **26** God het, nadat Hy Sy Seun Yeshua opgewek het, Hom eerste vir julle gestuur om goeie dinge oor julle te laat kom deur elkeen van julle weg te draai van sy booshede."

In verwysing na die verbond, word Yeshua as die vervulling van יהוה se beloftes voorgehou en dat dit steeds volgens God se verbonds-ooreenkoms eerste aan Yisra'el aangebied word.

Gal 3:16-18 "Die belofte is aan Avraham belowe en aan sy Saad. Hy sê nie vir hom: 'Aan jou sade,' asof dit na baie wys nie, maar "Aan jou Saad," na Een: Hom wat Die Gesalfde Een is, 17 maar ek sê dít: die verbond wat deur God, in Die Gesalfde Een, bekragtig is, is nie deur die geskrewe wet, wat vier honderd en dertig jaar later gekom het, gekanselleer om so die belofte tot niet te maak nie, 18 maar as die erfenis vanuit die geskrewe wet is, dan is dit nie meer vanuit die belofte nie, maar God het dit aan Avraham deur 'n belofte gegee."

Heb 8:6,7,13 " maar nou het Yeshua, Die Gesalfde Een 'n beter bediening ontvang as daardie, net soos wat die verbond ook beter is, waarvan Hy Tussenganger gemaak is, met beter beloftes as wat gegee is,⁷ want as die eerste een sonder fout was, was daar nie plek vir hierdie tweede een nie,
13 Deurdat Hy sê 'nuwe,' het Hy die eerste as oud verklaar en dit wat verouderd en oud is, is naby vernietiging."

- Spesifiek van die verbond van offers.

Mat 5:17-19 "Moenie dink dat Ek gekom het om die Wet of die Profete te vernietig nie. Ek het nie gekom om te vernietig nie, maar om volledig te maak, 18 want dit is waar wat Ek vir julle sê: Totdat die hemel en die aarde verby sal gaan, sal nie een 'yud' of een 'strepie' van die wet verbygaan, totdat dit alles klaar gebeur het nie. 19 Enige een, wat daarom aan een van die minste van hierdie opdragte ongehoorsaam is en ander só leer, sal die minste genoem word in die Koninkryk van die Hemel, maar elkeen wat dit doen en leer, hy sal groot genoem word in die Koninkryk van die Hemel,"

Net soos Yeshua die vervulling van die belofte is, [dit beteken Hy het die belofte kom waar maak en volledige betekenis gegee daaraan], net so het Hy die wet kom vervul. [Tog met dieselfde betekenis!] Yeshua het nie die wet laat verval of verbygaan nie!

Dit is nodig om te wys daarop dat sommige groepe die doop leer as teken van die nuwe verbond in die plek van die besnydenis. Behalwe dat daar GEEN skrif is wat so 'n stelling regverdig nie, kan ons sien uit die boonste dat יהוה se teken 'n teken van bloed is: die bloed van Yeshua, wat ons herdenk deur die beker by die Meester se maal, soos besnydenis die teken was van die verbond met Avraham en die volk.

Die doop is vir gelowiges gegee as 'n stap van gehoorsaamheid tot aflegging van die ou natuur, deur saam met Yeshua te sterf en deur vereenselwiging met Yeshua, 'n opstanding uit die dood van sonde - Rom 6:1-8. Die verbondsteken was nog altyd een van bloed.

Die verbond se fisiese oordrag met geboorte, is in die nuwe verbond vervang met 'n geestelike geboorte. **Geen persoon word nou in die natuurlike in die verbond van יהוה gebore nie**, selfs nie in die verbond met Avraham nie, **Rom 4:1-16**, maar word deel daarvan deur vertrouwe, asook in die nuwe verbond deur wedergeboorte in gehoorsaamheid!

Mat 3:9; Luk 3:8; Yog 8:39-40; Gal 3:6,8,29;
Ya'akov 2:23.